

楚

辭

集

解

楚辭集解九章卷

新安 汪瑗 玉卿 集解

哀郢

瑗按史記楚世家周成王時封楚熊繹於丹陽及楚文王自丹陽徙都江陵謂之郢後九世平王城之楚頃襄王之子爲考烈王考烈王二十二年徙都壽春命曰東郢屈平當考烈王徙壽春之時死已久矣此郢乃指江陵之郢頃襄王時事也又按秦世家秦昭王時比年攻伐列國

赦罪人而遷之二十七八年間連三攻楚拔黔  
中取鄢鄧赦楚罪人遷之南陽二十九年當頃  
襄王之二十一年又攻楚而拔之遂取郢更東  
至竟陵以爲南郡燒墓夷陵襄王兵散敗走遂  
不復戰東北退保於陳城而江陵之郢不復爲  
楚所有矣秦又赦楚罪人而遷之東方屈原亦  
在罪人赦遷之中悲故都之云亡傷主上之敗  
辱而感已去終古之所居遭讒妒之永廢此哀  
郢之所由作也其曰方仲春而東遷曰今逍遙  
而來東其遷於東方無疑但過夏浦上洞庭渡

大江不知其實爲東方之何郡邑也舊註謂屈原被楚王遷已於江南所作非也朱子又謂原被放時適會凶荒人民離散而原亦在行中夫所謂何百姓之震愆民離散而相失者乃指國亡君敗百姓被秦遷徙卽史記之所謂襄王兵散遂不復戰而東走是也朱子謂離散爲凶荒絕無所據失其旨矣

皇天之不純命兮何百姓之震愆民離散而相失兮方仲春而東遷

純命謂天命不雜而有常也今楚之失國則雜亂

而無常矣瑗按詩書叙喪亂之故多歸之天命太史公曰人窮則反本故勞苦僊極未嘗不呼天也是矣震愆驚惶失錯也離散而相失猶孟子所謂父子不相見兄弟妻子離散也卽承上句而申言之耳仲春二月也此特紀其時爾朱子從王逸之說而推衍之謂二月陰陽之中冲和之氣人民和樂之時也其說精矣恐當時屈子本無此意不然下文曰甲之朝吾以行又將何以解之耶昔秦昭王遣將白起攻楚遂拔郢赦罪人而遷之於東屈原久遭罪廢亦在行中閱其流離因以自傷無所

歸咎而歎恨皇天之不純其命不能祐我國家相  
協民居而使國亡君敗民遭此流離之苦也此下  
十一節皆承東遷而言

去故鄉而就遠兮遵江夏以流亡出國門而軫懷兮  
甲之朝吾以行

故鄉指郢都也就遠謂東遷也遵循也江夏二水  
名此句總言之下八節又以江與夏分言之第十  
一節曰江與夏之不可涉又總言以結之也流亡  
謂爲罪人而遷徙也王逸曰言已東行循江夏之  
水而遂流亡無還鄉之期也軫痛也甲日也朝旦

也言以甲日朝旦而啓行也瑗按上章紀其時此章紀其日史記載拔郢之歲不紀時日觀此可以推矣豈獨少陵爲詩史哉人但知少陵之詩可以考唐之亂而不知屈子之騷尤可以徵楚國之敗也

發郢都而去閭兮怊慌惚其焉極楫齊揚以容與兮哀見君而不再得

郢都卽指漢南郡江陵縣也閭里門也怊悵然貌慌惚不定貌焉極猶言無窮也楫舩櫂也齊揚衆舟同舉也容與徘徊貌不忍遽離故鄉也上章言

行猶未行也此則發舟而長逝矣瑗按何百里之  
震愆民離散而相失楫齊揚以容與則可以知東  
遷者非只屈原一人也而篇內之所謂去故鄉而  
就遠發郢都而去閭望長楸而歎息哀州土之平  
樂其所叙流離等語非獨述一已之懷也蓋將以  
衆人之憂而爲憂也至於哀見君而不再得曾不  
知憂之爲丘孰兩東門之可蕪至今九年而不復  
則其愁思之所在微意之所存衆人有不得而知  
者矣

望長楸而太息兮涕淫淫其若霰過夏首而西浮兮



顧龍門而不見

楸梓也長楸所謂故國之喬木而古人多於墳墓  
上種之故後世亦指墳墓爲松楸望而太息謂瞻  
望弗及令人痛傷也淫淫不止貌霰雨雪雜下也  
字見詩與爾雅淫淫若霰涕泣之甚也始而望焉  
旣而太息焉旣而涕泣焉其情之愈哀愈甚者蓋  
古人去國則哭于墓而後行哀墓之無主也柳子  
厚曰每遇寒食皂隸庸丐皆得上父母丘墓馬醫  
夏畦之鬼無不受子孫之養者今此東遷終無反  
國之期而丘壟之永無主矣能不哀哉橫渡水曰

過夏首夏水口也西浮謂西向而流也回首曰顧  
龍門王逸及水經皆謂郢城之東門是也前所出  
國門而軫懷卽出此門也江陵記以爲楚南門朱  
子從之非是上云遵江夏以流亡蓋自郢都而東  
行也此云過夏首而西浮是又橫過夏口而向西  
浮故回首顧望而不見都門則其悲愈甚矣瑗按  
此上三章初言去故鄉次言去閭里次言去墳墓  
其叙事以漸而愈切初言軫懷次言恍惚次言涕  
泣其叙情以漸而愈甚讀者須知此意而庶乎不  
見其爲重複之可厭也

心嬋媛而傷懷兮眇不知其所蹊順風波而流從兮  
焉洋洋而爲客

嬋媛顧戀留連之意眇猶遠也蹊踐也水東流爲  
順流從順流而從也此云順風波而流從則又從  
西而轉之於東矣焉音煙洪氏如字讀非是洋洋  
無所歸貌此承上章而言已顧視龍門不可得見  
則心戀懷傷眇然不知其所踐矣且今順此風波  
縱其漂流而洋洋乎果將安所而爲客邪蓋故設  
爲無所歸止之詞以見去故鄉而就遠也下章忽  
翱翔之焉薄意倣此或曰戰國之時其徙都遷民

固其常事然罪人倉卒被驅逐吏而行實未有的  
知其果遷於何所者非特設言耳蓋不使之知者  
恐其豫防生變而敵國邀擊之也其說亦通

凌陽侯之汜濫兮忽翺翔之焉薄心絀結而不解兮  
思蹇產而不釋

凌憑凌也其舟楫之簸盪乎水若憑凌之耳舊註  
曰乘也陽侯水神也戰國策曰塞漏舟而輕陽侯  
之波則舟覆矣淮南曰陽侯之波逆流而擊註云  
陽侯陵陽國侯也其國近水溺死於水其神能爲  
大波因謂之陽侯之波也汜濫大水貌薄止也翺

翔焉薄言人之漂泊而行不知所歸猶鳥之翱翔而飛不知所止也絀懸也蹇產詰曲貌洪氏曰山曲曰巉嵯蹇產古省文耳絀結言憂心如繩之絀結而約束不可解蹇產言憂思如山之蹇產而局促不能開豁也此承上章而申言之耳凌陽侯之汜濫卽順風波而流從也忽翱翔之焉薄卽眇不知其所蹠焉洋洋而爲客也心絀結而不解二句卽心嬋媛而傷懷也

將運舟而下浮兮上洞庭而下江去終古之所居兮今逍遙而來東

運回轉也地勢以東爲下下浮謂順流而下浮也  
卽上順風波而流從之意前言過夏首而西浮也  
今又將運舟而東浮矣方將運舟而東浮也則又  
將上洞庭逆流而泝矣方且逆流而泝也則又將  
順流而下江矣二句之間其道里之縈紆遷客之  
顛沛具見之矣然謂之曰下江則此時蓋已過夏  
水而入大江矣終古之居謂先人自古居於此土  
而子孫百世不遷者也今則失之漂搖而來東矣  
璦按此上三章初言不知其所躋次言翱翔之焉  
薄設爲無所歸止之詞終言逍遙而來東卒指其

所向之方以實之也詩經多有此體又按逍遙本  
優游行樂之意今又當解作漂搖流落之意故讀  
古書者不可以詞害意也或曰首二句言道里之  
縈紆第三句言故鄉之日遠末句言遷謫之流離  
羗靈魂之欲歸今何須臾而忘返背夏浦而西思兮  
哀故都之日遠

靈魂猶今言魂靈謂人之精神夢想也王逸曰精  
神夢遊還故居也是矣須臾頃刻也返猶還也謂  
還故都也二句言夢寐之思故都無頃刻而忘之  
其眷戀之情可知矣浦水中之沙洲也背夏浦謂

已過夏浦而在已背後也西思謂漸近所遷之東  
方而郢都又在於西矣故曰背夏浦而西思思者  
默念深想之意非回首顧望之謂也此時蓋已過  
夏水出洞庭入大江久矣故都之日遠矣故哀思  
之深而夢寐之不忘也朱子曰時未過夏浦故背  
之而回首西向以思郢也非是或曰上二句言夢  
寐之頻下二句言思歸之甚惟其思之甚故夢之  
頻也

登大墳以遠望兮聊以舒吾憂心哀州土之平樂兮  
悲江介之遺風



水中高者爲墳詩曰遵彼汝墳是也大墳則可以  
望遠矣遠望遙瞻郢都也上章言思之此則言望  
之矣州土謂郢都之風土也平樂謂地寬平而人  
饒富也江謂大江也蓋此時夏水雖盡而大江猶  
未過也介間也與界同一正作界遺風猶言緒風  
也此章言已登大墳以回望故都本欲聊以舒吾  
之憂心然故都平樂之風土日邈以遠而漂泊於  
此大江之介感風景之殊使吾之心益哀而悲焉  
朱子解遺風爲故家遺俗之善也非是

當陵陽之焉至今森南渡之焉如曾不知憂之爲丘

今孰兩東門之可蕪

陵陽朱子曰未詳瑗按洪氏解前陽侯引淮南註  
曰陽侯陵陽國侯也則此陵陽卽陽侯也明矣陽  
侯兼稱其爵陵陽專稱其國耳洪氏解此又引仙  
人陵陽子爲說是亦過求之弊也當陵陽之當如  
兩雄力相當之當謂陵陽之波起而舟以當之也  
其義與前陵字相近焉至猶言何所歸也淼渺同  
滉漾無涯貌渡濟也於是始南過大江而迫近所  
遷之地矣焉如猶言何所往也此二句互文而重  
言之耳蓋言已乘此陵陽之波淼然南渡大江矣

果將何所歸而何所往耶實反言以深見遷客之  
流離故都之日遠也上言方仲春而東遷今逍遙  
而來東則當時所遷之地乃在東方而此云南渡  
者蓋南渡大江者所由之路而所遷之方又將從  
南而轉歸於東也或曰當時所遷之地恐在東南  
之方而非正東也未知其審大抵此上所言經由  
之道自郢至東皆係水路其大勢雖不過沿江夏  
二水之間然或東或西或南或上或下其水勢之  
曲折縈迴叙述最詳非嘗遠遊經歷者不知此意  
嚴滄浪曰九歌不如九章九章哀郢尤妙蓋指此

也如以詞而已矣未見其勝諸篇也瑗嘗謂此文似一篇遊山之記盖有得乎禹貢紀事之法但脫胎換骨極爲妙手非後世規規模擬者比也其所叙憂愁之情者特欲雜之以成章耳不知者鮮不以爲重複可厭也但今瑗所註者特按文畫圖以意推測而言之未知其果是否也嘗欲褻裱直至郢都遵江夏以遊遊而遍歷其地親訪遺迹則此文之妙當有出於想像之外者矣惜乎此時未暇且姑依文以釋之尚當竢親歷而更訂焉夏大屋也丘荒墟也夏之爲丘指宮殿而言孰誰也兩東

門郢都東關有二門也蕪穢也東門之蕪指城郭而言瑗按秦將拔郢之時而城郭宮殿其燬者多矣史記獨載燒墓夷陵者舉其重者而言也吾故曰離騷足以徵楚國之敗者此類是也或曰屈子備言宮殿城郭而不言燒墓何也曰望長楸而太息蓋已先言之矣此騷之可以爲史也然夏屋已丘墟矣而襄王曾不知之城門已蕪穢矣而曾不知先王所設以守國者不可廢也非真不知也安於敗亡甘受困辱而無恢復之志若付之不知也則襄王之不足以有爲可知矣屈子之責襄王者

深矣又按此上三節初言故都之日遠次言州土之平樂次言城郭宮殿之丘蕪其叙事以漸而切而情亦因之矣

心不怡之長久兮憂與憂其相接惟郢路之遼遠兮江與夏之不可涉

怡樂也憂憂相接言憂心如連環不斷絕也朱子曰首尾如一繼續無已也此句卽申言心不怡之長久然其所以憂而不樂之意蓋悲遷流於東而郢路遼遠故都云云江與夏之不可復涉矣江與夏之不可涉謂從此再不得復涉江夏而歸郢都

耳瑗按此篇乃是東遷既至於其所而追思途中之情所經之道而作者故叙道路之曲折詳細始終具備如此焉此上十一節皆述去國之悲及所經之道也此下四節蓋悲已之久放遭讒之嫉妬也亂辭則無此二意

忽若去而不信兮至今九年而不復慘鬱鬱而不通兮蹇侘傺而含蹙

忽若去猶言忽若遺也不信不信任也不復不召還也按秦拔郢在頃襄王二十一年今日九年不復則見廢當在頃襄王十三年矣但無所考其因

何事而廢耳朱子解夏之爲丘東門之蕪曰不知  
在拔郢後幾年也又曰此云九年不復不知的在  
何時也夫夏之丘門之蕪卽爲秦將白起拔郢燒  
陵之事無疑矣又曰不知在此後幾年惟其不以  
此篇爲拔郢之時所作故不知所廢之年是皆未  
之深思也慘感傷貌不通言憤懣之氣填塞於胃  
也侘傺猶傍徨也失志貌感促也含蹙言心中之  
局促也此章言已廢斥之久而憂思之深也

外承歡之淖約兮謀荏弱而難持忠湛湛而願進兮  
妬披離而鄣之



外外貌也以見中心之不然承奉也承歡承奉君之歡心也汭約諂媚態與他所用汭約字不同諶誠也荏亦弱也論語曰色厲而內荏詩曰荏染柔木瑗按弱翦同招魂曰翦阿拂壁蓋荏翦皆柔軟之木此雖無係大義觀此亦可見古人之用字皆有來歷而學者不可不知也難持不能自主也二句言佞人之害深而君心之易溺也湛湛澄清貌忠貞之澄清與讒諛之溷濁而相反也願進欲告之於君也妬者忌人之有也披離亂雜貌故花之將敗草之將衰皆謂之披離謂紛披而離散也舊

解爲衆盛貌蓋以亂雖解之則衆盛在其中矣鄣  
壅也此二句言已欲進思盡忠而讒人妬忌披離  
以鄣壅之也此章承上言黨人之佞足以傾人君  
之心而阻忠臣之進以見已久廢不復之由也朱  
子曰言小人外爲諛悅以奉君之歡適情態美好  
誠使人心意軟弱而不能自持是以懷忠而願進  
者皆爲所嫉妬而壅蔽不得進也此章形容邪佞  
之態最爲精切讀者宜深味之則知佞人之所以  
殆又信此語與孔聖之言實相發明也

彼堯舜之抗行今瞭杳杳其薄天衆讒人之嫉妬今

被以不慈之僞名

離騷言茂行此言抗行茂言其盛抗言其高也瞭目明也杳杳廣遠高大貌猶論語之所謂巍巍蕩蕩也薄天所謂唯天爲大唯堯則之也嫉者惡人之有也被猶加也不慈不愛其子也堯舜皆以天下與賢而不與子故有不慈之名莊子曰堯不慈舜不孝蓋戰國時流俗有此語也僞名非實有是事而妄受虛名也此承上章妬披離而障之之句而言以責讒人也堯舜之德行杳杳薄天可以瞭然無疑而讒人猶紛紛嫉妬以毀謗之而僞加之

以不慈之名何其不知量也嗚呼堯舜之行不以  
讒人嫉妬而有損則屈子之忠又豈因讒人嫉妬  
而有所泯哉吾見讒人之用心日勞日拙而聖賢  
之心事愈扶愈明浮雲之點綴又何傷於日月之  
明乎上官大夫之徒亦可以自省矣

憎愠憮之脩美兮好夫人之忼慨衆踳蹀而日進兮  
美超逮而踰邁

此承上章諶荏弱而難持之句而言以責人君也  
憎惡也愠含怒意憮怨恨也惡而至於怒怒而至  
於恨言疾之之甚也憎愠憮之脩美猶離騷覽相

觀於四極之文法旣言覽又言相又言觀以三字相連爲意古人多有此文法洪氏解愠爲心所蘊積也思求曉知謂之惓惓固訓思也然以愠爲蘊非是論語曰人不知而不愠此用其字也又曰屢憎於人惓字雖無所考以上二字推之當從予解爲是吾故曰解吾人之書當以意會不可盡以說文爲拘也脩美猶言長才也好愛也夫人指讒人也忼慨激烈軒昂之意本大丈夫之事非不美也但讒佞之人外貌故爲此忼慨之態而其中實懷承歡汨約之心而人君遂不深察而好之耳必如

屈子之離愍不遷知死不讓而後足以謂之忼慨也故曰好夫人之忼慨以見不知好君子大丈夫之忼慨也嗚呼君子之脩美外若迂闊而其實可大用也而人君則疾之小人之忼慨外若可喜而其實可深惡也而人君則愛之此所謂變白以爲黑倒上以爲下者也夫白黑上下兒童之所能辨也君子小人庸主之所能知也然而每每變亂而倒置者固讒人郭壅蔽隱之害而亦由人君之心意軟弱不能自持樂其承歡汨約之態故雖明明知其爲君子而蹇蹇然不能用明明知其爲小人

而戀戀然不忍舍也是豈真不知君子小人之分哉知人則哲惟帝其難是固然也然知之而不能決之者徃古如此者抑又多矣後世人君之用臣也可不知慎所愛憎哉衆指忼慨之徒踳蹠衆進貌日進進而不已也美指君子之流超遠謂超然遠去也踳蹠猶言遁逸也惟人君好夫人之忼慨此所以黨衆之小人紛然而日進也惟人君憎愠倫之脩美此所以脩美之君子超然而遠遁也惟黨衆之小人踳蹠而日進此所以脩美之君子超然而踳蹠也固有見幾而作不待遷黜而放逐者

矣嗚呼小人之進君子之退也君子小人之二進一退係於君心一念好惡之微而國家之治亂存亡隨之矣可不知所謹哉下二句承上二句而言朱子以美超遠而踰邁亦貼小人講非是

亂曰曼余目以流觀兮冀壹反之何時鳥飛反故鄉兮狐死必首丘信非吾罪而棄逐兮何日夜而忘之曼目謂引目遠視也流觀謂周流遍觀也冀期望之意一反何時謂意欲期望一還郢都不知其果於何時而得歸也蓋甚言其無反國之期耳鳥反故鄉思舊巢也狐死首丘念舊窟也首丘謂以首



枕丘而死不忘其所自生也禮曰天地之間凡有血氣之屬必有知有知則莫不愛其類故大鳥獸以至啁噍之微喪其群匹越月踰時則必反巡過其故鄉而鳴號踴躍焉又曰樂樂其所自生禮不忘其本古人有言曰狐死正首丘仁也淮南曰鳥飛反鄉狐死首丘各哀其所生也蓋襲此語信非吾罪而棄逐蓋言已之遭放誠非實有罪過特以讒人之妬君之不明耳忘謂忘其故鄉也何日夜而忘之卽上何須臾而忘反之意瑗按此時郢都已破宮城之毀陵墓之焚君上之敗走百姓之離

散而故國爲荒涼草莽之丘墟矣屈子猶拳拳欲  
歸故都者亦謂得如鳥獸之死于舊巢舊窟足矣  
可謂仁之至義之盡矣自謂重仁襲義謹厚以爲  
豐者非虛語也然懷王客死於秦鄙襄王旅斃於  
陳城竟不以故都爲念曾不知夏之爲丘孰兩東  
門之可蕪也是誠何心哉夫郢自楚文王遷都以  
來至懷襄幾四百年而祖宗舊物一旦爲暴秦所  
奪曾不知一思及之方且卑卑然與之會盟講和  
入子爲質其不足與有爲而無耻也甚矣獨屈子  
抱區區之忠雖無日夜須臾而忘之亦將柰之何

哉屈子曰信非吾罪而棄逐者非急急于自表暴  
乎已也蓋深責襄王之棄賢而亡國也使襄王聞  
屈子之言而深悔之復召還屈子與之共謀國政  
訓練所收十萬之東兵猶足以馳騁乎天下矣况  
區區之郢都又豈有不可復者哉嗚呼哀郢之作  
而以譏人之嫉妬用賢之倒置終之豈無意乎襄  
王迷而不悟懦而無爲使屈子之志竟莫能伸而  
千古之恨至今誦之令人太息不已故太史公讀  
哀郢而悲其志焉

楚辭集解九章卷

新安 汪瑗 王卿 集解

抽思

哀郢曰方仲春而東遷懷沙曰滔滔孟夏抽思  
曰悲秋風之動容可以考其所作之時矣洪氏  
曰屈原以仲春去國以孟夏徂南土則抽思其  
作於是年之秋歟作於是年之秋則序當在懷  
沙之後矣是頃襄王時所作王逸以爲指懷王  
非是也或曰抽思作於哀郢之後在頃襄王之

時是矣然抽思尚多愁嘆苦神之語猶望覽民  
尤以自鎮結微情以陳辭而懷沙乃多舒憂娛  
哀之言冤屈而自抑抑心而自強而已耳其氣  
漸平其怨稍殺意者抽思作於東遷之秋懷沙  
作於次年之夏者也今按其說亦通未知其審  
不敢輒自移易姑從舊序因綴其說於題下以  
俟後之君子有所考據而訂證云其篇內大旨  
則因秋夜有感述已思君念民流離遷謫夢歸  
故鄉之情之所作也其間何極而不至遠聞而  
難虧善不由外來名不可虛作數語又深有得

乎吾儒性理之學切實之功而非宋景鄒效之  
徒之所能窺其萬一者也戰國之時孟子之外  
一人而已豈特楚之巨擘而已哉

心鬱鬱之憂思兮獨永歎乎增傷思蹇產之不釋兮  
曼遭夜之方長悲秋風之動容兮何回極之浮浮數  
惟蓀之多怒兮傷余心之悵悵

鬱鬱鬱而又鬱憂思之甚也永歎增傷申言憂之  
甚也蹇產不釋申言思之甚也曼亦長也謂之曰  
遭夜方長則孟秋之夜也此上四句海虞吳訥以  
爲比體大謬矣秋風動容謂寒氣中人使人顏容

蕭索而變易也動容猶言變色改容耳舊說俱謂  
秋風起而草木變色非是回如悲回風之回言風  
之旋轉不舍也極盛也浮浮猶飄飄也言秋風之  
浮浮然回旋飄轉極盛而不止故其氣之慘悽凜  
冽足以傷懷而損容也王逸訓極為中言楚王爲  
回邪之政不合道中則其化浮浮流行群下皆效  
洪氏訓極為至言回邪盛行猶秋風之搖落萬物  
也訓極為至似矣而意又依王說朱子疑回極指  
天極回旋之樞軸浮浮言其運轉之速而不可常  
皆非是也此句卽應上秋風字而言之亦文順而

意穩矣又何必析而斷之以他求說邪數音朔頻也舊作上聲讀蓀香草以喻君也後倣此多怒怒而無節也慓慓痛傷貌此章言已之所以憂思者因感秋夜之長秋風之厲已鬱鬱於懷矣而復憶楚王之爲人數數然多怒而無節有如秋風之浮浮然回旋而不舍益使已心之慓慓然而痛傷也屈子愛君之心可謂無往而不在矣瑗按悲秋之說實昉於此而後世詞客皆謂宋玉悲秋而不知屈子已先之久矣王十朋又謂詩人之用故事多含祖而取孫是何言哉瑗每嘆世人讀書多不揣



其本而齊其末雖博雅君子不能無此病故附其說耳

願遙赴而橫奔今覽民尤以自鎮結微情以陳辭今矯以遺夫美人

此下至少歌皆承上章惟蓀多怒而言願欲也遙赴不憚遠勞也橫奔不暇從容也或曰遙赴直言之橫奔橫言之亦通大抵急於救民親君故也覽猶省察也罪自外至曰尤楚王多怒性暴無常則民之獲罪有非其所自取者矣鎮謂安撫之也結微情以陳辭謂搏結此微情以爲辭而陳之也情

者辭之蘊辭者情之著下倣此矯舉也美人亦指  
君也後倣此此章言已欲急於救民者蓋見民之  
遭怒多非其罪而已欲往一安撫之以慰民心遂  
將此情以告之於君使知有所改而息其怒也然  
言卒有不可結而詒者故感秋風之起而思君憂  
國之情有不能忘者焉覽民尤一句欲救民也結  
微情二句欲匡君也然匡君者又所以爲救民之  
本也

昔君與我成言今日黃昏以爲期羗中道而回畔今  
反既有此他志

昔謂往日也成言謂君昔日委任之時相約共謀國政而有一定之言也如春秋平成之成謂戰國君臣多有盟誓之事觀此語屈子屢述其意或當時亦有約言而後倍之者也曰者叙君始約成言之詞黃昏以爲期是也黃昏日沒之時喻晚節也淮南子曰日薄於虞淵是謂黃昏黃昏者一日之終喻人一身之終也言楚王昔日與已相約之成言曾以終身爲期而毋許變易也中道回畔此又以行路而喻成言之不終也戰國策曰行百里者半於九十言末路之難也反復也他志謂生別意

而背昔日之成言也王逸曰信用譏人謂已不忠  
遂外踈也是矣此章言君與已始親而終踈已合  
而復離有言而不信蓋亦多怒無常之所使然也  
前解黃昏是從王洪之說甚爲明白朱子以婚禮  
釋之頗覺迂濶非是

憍吾以其美好兮覽余以其脩姱與余言而不信兮  
蓋爲余而造怒

憍驕同矜也莊子曰虛憍而盛氣荀子曰憍泄者  
人之殃也覽猶示也脩姱亦美好也美好脩姱喻  
才能也此章言楚王自恃其才能驕矜誇示於已

故畔成言而怒逐已也。瑗按當是時懷王已客死於外而已。又失郢都正當卧薪嘗膽延攬英雄相與共治以圖報讎之舉。顧乃聽信奸佞怒逐忠良。方且箕踞自恣。回畔成言。是誠何心也。夫國家可以一人有而不可以一人理。可與君子共而不可以小人參也。久矣。又况介於秦齊強暴之間。侵伐多事之際。父讎未報之日。社稷燬敗之餘。其可恬然而安。瞽然而肆乎。匹夫有怨尚欲報之以萬乘而坐受困辱。宜爲射者之所不取也。况屈子又安能憇然於懷乎。嗚呼。拔郢燒陵之慘。東走陳城之

辱頃襄王之所自取無足責也然而國亡君敗正  
忠臣志士戮力王室之秋而以屈子之精誠才能  
曾不得效犬馬於其間而爲大厦將顛之一木可  
慨也夫

願承問而自察今心震悼而不敢悲夷猶而冀進今  
心怛傷之惓惓

閒閒暇也莊子曰今日宴閒是也察明也震悼猶  
言戰慄也不敢不敢進而自明也或曰前結微情  
以陳辭將以言而致之君也此云承閒自察則欲  
面諫之矣其情愈切而其事愈難其心愈悲矣夷

猶遲回之意所謂足將進而趨起是也怛傷惻怛而傷感也惓惓怛傷貌洪氏解爲安靜非是九辯曰心煩懣兮忘食事是懣不獨解爲恬懣之懣讀古人書要當以意會隨其章旨而解之不可執一定之訓詁說文也下二句卽申言上二句之意大都謂已欲乘間冀進而自明其情然心復悼傷而不敢進者恐君之多怒不惟其言之不聽而反重得罪故也朱子之解又多一轉折非是至曰觀此則知屈原事君惓惓之意蓋極深厚豈樂以忤直犯上而取名者哉則其說深得屈子之心而足以

表章千載沉鬱之旨顏之推病其顯暴君過班孟  
堅譏其責數懷王其妄誣之非可以不攻而自破  
矣或謂承間爲乘其間隙之時間去聲讀其意亦  
相通也瑗按此上四章言今日之所欲陳下四章  
追述昔日之所已陳者也

歷茲情以陳辭兮蓀佯聾而不聞固切人之不媚兮  
衆果以我爲患

歷猶列也茲此也佯詐也佯聾不聞謂已所歷之  
情所陳之辭雖實聞之而詐爲聾態若未嘗聞之  
也忠言逆耳不欲聞之故耳齊宣王聞孟子四境



不治之言特佯顧左右而言他卽此意也切人不媚言忠誠懇切之人不能爲阿諛諂媚之事原自謂也衆指黨人也此章追述往日進諫之忠上不見納于君而下復見嫉于衆也屈子譴謗之困遷怒之媒其懇切不媚之所基乎嗚呼直道之不行於世也久矣有志者讀此能不爲之掩卷而太息也哉

初吾所陳之耿著兮豈不至今其庸亡何獨樂斯之蹇蹇兮願蓀美之可完

初謂往日成言之時也耿著言已所陳之辭乃光

明正大昭彰宣朗之道而非卑汙隱僻愚君之說也豈不至今其庸亡謂其辭雖至今尚在而未滅也王逸曰文辭尚在可求索也是矣朱子曰庸何用也左傳曰晉其庸可冀乎言昔吾所陳之言明白如此豈不至今猶可覆視而何用乃亡之邪瑗按朱子之解又多以轉折不如前解平直讀離騷者以意逆志可也以辭害意不可也又按屈子所陳之辭今不可得而聞其詳然下二章之所言其王道之大聖學之純亦可以得其概矣雖至於貶謫遷逐九年不復歷年離愍玷於死亡而不變又

可以驗其所陳於君者乃已平日躬行心得之實  
非徒責難於君而已也其視戰國遊說之徒初以  
三皇五帝之道誑其君而卒以縱橫閹押慘礪刑  
名之術售其能者不亦霄壤也哉朱子謂屈子千  
載一人信夫蹇蹇忠直貌願蓀美之可完言欲君  
德之全備也朱子曰然吾非獨樂爲此蹇蹇而不  
樂爲順從也但以願君之德美猶可復全是以不  
得已而爲此耳所謂尚幸君之一寤者如此其志  
切矣此上二句追言昔日直道之害而因表已盡  
忠之心也

望三五以爲像今指彭咸以爲儀夫何極而不至兮  
故遠聞而難虧

三五三皇五帝也彭咸殷賢大夫也望仰而慕之  
也指期而的之也像儀皆法也極義理旨趣之妙  
處也何極不至造詣之深也遠聞難虧聲譽之隆  
也此下二章啓人君之法古并示其功而歆其効  
也亦承上章願蓀美之可完而言言必如此而後  
君德可完也必先何極而不至然後遠聞而難虧  
也屈子此言可爲以片長寸善自足者誠干譽釣  
承自欺者警矣學者宜深味之或謂三五句勉之

君者彭咸句勉之已者亦通

善不由外來今名不可以虛作孰無施而有報兮孰不實而有穫

承上章末二句而言善者吾性之所固有而人心之所同具者也非外鑠我者也孔子曰君子去仁惡乎成名此名不可以虛作也下二句又以報施之禮耕穫之道申喻之也或曰先施而後有報是報非由外來乃由內出者也喻善不由外來也苗而不秀秀而不實皆無所穫也是有實而後有穫非空穗之能有所得也喻名不可虛作也瑗按分

帖亦通總承亦可但朱子疑實字當作殖字瑗謂不若實字有味朱子曰此四語者明白親切不煩解說雖前聖格言不過如此不可但以辭賦讀之也

少歌曰與美人之抽思兮并日夜而無正憮吾以其美好兮傲朕辭而不聽

少如字謂小歌耳故只四句猶後世所謂短歌行也一正作小字荀子佹詩亦有小歌卽此類也舊作去聲讀亦小字之義王逸曰小吟謳謠以樂志也是矣朱子解爲樂章音節之名更詳之抽思猶

言盡心也言已昔日爲君圖謀政治無并日夜勞心焦思而不休息君反不能平正其是非顧乃自多其能而爲余造怒倨我之言而不采聽也此與下章倡言猶倨詩之所謂反詞總論前意反覆說之也瑗按并日夜而無正猶言并日夜而不止之意朱子謂無正無與平其是非也哀時命有曰懷瑤象而握瓊兮願陳列而無正則無正又似當解爲無由之意朱子亦解爲言無人能知已之賢而平其是非也瑗嘗謂解古人之書當隨文會意不當以詞害意且古人用字實有一二與今不同學

者不可不知前解未有證據姑從朱子并附鄙見  
以俟後之君子云又按詩雨無正韓詩作雨無極  
是正字古或有極字之義此作并日夜而無極止  
之意方明白更詳之

倡曰有鳥自南兮來集漢北好姱佳麗兮牂獨處此  
異域既惇獨而不群兮又無良媒在其側道卓遠而  
日忘兮願自申而不得望北山而流涕兮臨流水而  
太息

倡亦如字大也不言歌者承上少歌而省文耳倡  
歌猶後世之所謂長歌行也此章十句皆是歌詞



洪氏讀爲倡和之唱朱子從之解曰亦歌之音節  
所謂發歌句者也容更詳之烏屈原託以自喻也  
南指郢都也漢北指當時所遷之地也屈原所遷  
之地其在鄢郢之南江漢之北乎故下文曰南指  
月與列星又謂郢都爲南狂顧南行又謂漢北爲  
南讀者要以意會可也朱子謂屈原生於夔峽而  
仕於鄢郢是自南而集於漢北也非是此章是述  
集南而遷於漢北之地下文所謂異域者卽指漢  
北也鄢郢乃楚王之都邑宗廟之所在而已又來  
仕於其國豈可謂之異域邪其非是也審矣好姱

佳麗亦託言鳥之美也。辟離散貌。悍亦獨也。不群  
不同於衆也。無良媒在側。謂無知己同志者在君  
之側。孟子曰。昔者魯繆公無人乎子思之側。則不  
能安。子思泄柳申詳無人乎繆公之側。則不能安。  
其身是也。道卓遠。日忘。謂已遠。遷於此而君不念  
之也。願自申不得。謂已欲進而歷情陳辭不可得  
也。皆無良媒在君側故也。望眺望也。北山卽指漢  
北之山。一作南山。非是。言已處此異域而不得還  
都。故登山臨水之際。舉目有風景之殊。不覺深爲  
流涕太息也。瑗按。少歌言已盡心於君國而君不

納其謀此歌言已遠遷於異域而君不召其還也  
望孟夏之短夜兮何晦明之若歲惟郢都之遼遠兮  
魂一夕而九逝

此下三章言夢歸郢都之情哀郢曰羗靈魂之欲  
歸兮何須臾而忘反是也按抽思畧有一二句與  
哀郢辭旨相同而鬱鬱之懷與哀郢並盛其作於  
東遷之秋無疑也篇首苦秋夜之方長憂不能寐  
而此望孟夏之短夜冀其易曉而憂稍殺也晦明  
若歲言秋夜之長自晦至明如歲之永未易曉也  
晦明二字須以意會不可平看遼亦遠也一夕一

夜也九逝謂夢魂歸郢都九次也夫夜旣長路又遠思歸又切一夕九逝魂勞甚矣此所以望夏夜之短也朱子曰晦明若歲夜未短也一夕九逝思之切也瑗按此時郢都已爲秦所拔矣夷陵已爲秦所燒矣頃襄王已東走於陳城矣而屈子猶惓惓不忘郢者豈特不忘故鄉之情而已哉蓋將欲襄王之恢復舊物報秦仇讎而後已此屈子思郢之微意也是時襄王收東地兵得十餘萬復西取秦所收江旁十五邑以爲郡距秦使由此而退小人進君子委任屈原苦身戮力如勾踐之於范蠡

則燒墓之辱不足報而郢可復矣奈何未幾復與  
秦平而入太子爲質并於僻守一隅坐受困辱是  
何心哉是何心哉吾見屈子之夢魂徒勞而思歸  
之心孤矣悲夫

曾不知路之曲直今南指月與列星願徑逝而不得  
今魂識路之營營

路郢路也謂郢路遼遠而夢中茫昧曾不知其曲  
直之可行但南指星月隨其方角而往耳朱子言  
初不識路後以月星而知向背是也下二句卽申  
上二句之意徑逝直歸也言不知路之曲直所以

欲徑逝而不得也識路猶俗言認路也言魂營營然南指星月而認路覓歸也瑗按此四句極盡夢歸之情狀必嘗實有此情此夢者而後知其妙也彼漫然而視之孰能味乎其言哉柳子厚夢歸賦世稱其妙而不知其昉於此也若柳子厚者可謂屈原之佳子弟矣

何靈魂之信直兮人之心不與吾心同理弱而媒不通今尚不知余之從容

朱子曰言靈魂忠信而質直不知人之心異於我故雖得歸亦無與左右而道達之者彼又安能知

我之閒暇而不變所守乎洪氏曰言尚不知已志  
况能召我也或曰此四句乃通有鳥自南而申結  
之自此以上皆倡歌也瑗按或人之說甚爲有理  
故附之

亂曰長瀨湍流沂江潭兮狂顧南行聊以娛心兮

瀨水淺處卽所謂灘也文選註曰水流沙上曰瀨  
是也湍波流滌迴之處孟子曰性猶湍水是也王  
逸曰湍亦瀨也得其意矣蓋湍與瀨字並看俗語  
又謂高灘之下必有深湍蓋灘高水峻衝激而爲  
湍耳曰湍流者倒文也逆流而上曰沂江潭二水

名舊解潭爲水深之淵非是卽今之潭州也狂顧  
猶狼狽之意朱子曰憂懼而驚視也是矣南行謂  
南遷也朱子曰自江入湖自湖入湘皆泝流而南  
行也此章言已經湍瀨泝江潭冒涉險阻狼狽南  
遷而不辭者聊以娛已之心志耳夫遷謫之苦人  
以爲憂而屈子以爲樂者蓋以爲吾道之果是吾  
心之所安也何流離顛沛之足患乎然則屈子之  
鬱鬱而憂思者其意蓋有所在矣豈爲一已之困  
窮也哉

軫石歲鬼蹇吾願兮超回志度行隱進兮



軫轉動也歲鬼巨石貌詩曰我心匪石不可轉也  
則石之可轉動也久矣回猶過也超回謂超而過  
之猶言超越也度度量也隱進猶言潛滋暗長耳  
君子之爲善未嘗皎皎使人知也此章言已不能  
變心以從俗而爲人之所嫉也深矣已非不欲從  
俗耳使吾之心能如石之可轉不遭讒妬之禍亦  
吾之願也然柰志度之超越德行之進脩而不能  
易初而屈志何哉盖反言以見已志之終不可變  
雖遭遷謫亦其心之所樂也瑗按屈子法古聖賢  
造詣精粗且知善不由外來名不可虛作方且守

確然不拔之志拓廓然無涯之量使吾之德行隱  
然而進直欲並三五而邁彭咸之不服也又奚暇  
計較區區之出處而遷謫之細故何足以芥蒂於  
其心胷哉遭憂患而不忘進脩屢黜逐而不變心  
志可謂壁立千仞者矣非有學有守者烏可勉強  
於悠久也哉又按此章詞旨甚明白說文曰軫動  
也舊解爲方也非是朱子又謂超回隱進亦不可  
曉豈未之深思邪

低徊夷猶宿北姑兮煩冤瞢容實沛徂兮

低徊夷猶留滯之意北姑漢北中之地名屈子當

時必遷居於此處也煩惱悶也冤屈枉也瞽容朱  
子曰瞽亂之意見於容貌也按瞽容雖由於煩  
冤盖亦秋風蕭颯之使然歟沛水疾流貌徂去也  
喻時光之迅容貌之衰誠有如水之沛然而逝不  
可返者矣舊說但言誠欲沛然如水之流去詞不  
別白不知所指者何也此章因已留滯於江南而  
嘆衰老之將至不得申其志也上章言德行之潛  
脩此章言功業之不建

愁嘆苦神靈遙思兮路遠幽處又無行媒兮

苦神猶言傷神也上云煩冤瞽容言煩冤之足以

損容此言愁嘆之足以損神也靈靈魂也遙思思  
郢都也王逸曰思舊鄉而神勞也路遠處幽所謂  
惟郢路之遙遠哀見君而不再得也又無行媒卽  
上又無良媒在其側之意良媒喻其常存好賢之  
心行媒喻其不憚舉賢之勞也此章言已思歸不  
得歸也王逸曰道遠處僻而無介紹也是矣

道思作頌聊以自救兮憂心不遂斯言誰告兮

道達也思憂思也頌卽指此篇之文也救解也不  
遂不遂其歸郢見君之心也斯言誰告人之心不  
與吾心同也此章言已欲道達憂思之心故作爲

此文聊以自解使不至於瞽容苦神之甚所以然者蓋以此心之不遂而世無知己之可與晤言者耳亂辭五章一章言遷謫之遠二章言志行之堅三章言留滯之久四章言不歸之由五章言作頌之故然意亦皆相承也瑗按前半篇其憂思之情已畧道盡少歌以下皆總申言前篇之意少歌之不足故倡歌之倡歌之不足故亂歌之有正文有少歌有倡言有亂辭此又文體之奇特者也離騷與遠遊楚辭中文之最長者也不過設爲靈氛之占以重曰更端而已耳讀者不可不知洪氏曰此

篇有少歌有倡有亂少歌之不足則又發其意而爲倡獨倡而無與和也則總理一賦之終以爲亂辭云耳又曰此篇言已所以多憂者以君信諛而自聖眩於名實昧於報施已雖忠直無所赴愬故反覆其辭以泄憂思也

楚辭集解九章卷

